



國雅卷之六

勾吳顧起綸玄言選

康修撰

名海字德涵號對山陝西武功人弘正間官翰林修撰

和六甥石室納涼

老境百慮息所好在山林况此洞室閔塵氛安可侵開  
簾見芳碧迤邐聞鳴禽因之感宿好笑歌梁甫吟丈夫  
志四海何人識此心所以夷與惠曠世懷高襟日夕涼  
風發逸興拂西岑沽酒共斟酌慚無絲竹音掃石卧煙  
霧聽子廣陵琴

石上小酌

公流歷層壑攀蘿下迴磴雖有芳草心未博遠遊興沈  
澹愕中流截業怛旋徑酌酒坐石上夕陽更輝映薄言  
呼兩君音響動相應始信空谷聲果叶靜者聽酒酣連  
袂歸悠悠心靡定

從象峯北崦下望普緣

陟山披叢薄覽景愜幽素降觀萬壑奔平臨千嶂赴宿  
愛彌見欣新賞豁相聚未覩赤城遊彷彿興公賦

靈寶縣北渡解州遙望餞送諸君子作

春遊過名里覽眺窮幽暱將邁苦匆促振袂惟太息執  
手河梁間徘徊意安極衰年多酒癥緣與輒強食節物

乖素心親故難屢值因之趣解梁不謂路咫尺佳辰違  
熙陽良晤悲古昔疾舟若轉焱相望忽相失

送袁解夫還蓋屋

吾愛袁解夫飄飄古狂客勁風凌千人高情協金石雖  
爲羣小排豈繫丈夫厄自古浮天雲焉能蔽白日酌酒  
發浩歌憑君永今夕

從軍行

烽火西傳虜騎來天王按劍雪山摧將軍裂眦奮一戰  
旌旗蔽日雲氣迴朔風獵獵天山遠層冰齧石交河斷  
材官爭取可汗頭諸君肯放名王返功成不日詔承明

賞賜先推飛騎營驍騰俱封二千戶錦衣朱纓義氣橫  
聲名絡繹傳鄉邑甲第崢嶸開上京回頭笑殺魯連子  
白髮龍鍾空一生

秋風詞

長安道上秋風起吹入青門草靡靡客子携琴燕趙來  
一感秋風心欲死鳴鞭躍馬過我前那堪杯酒重留連  
酒酣氣發百志奮談笑湏臾空百年坐中歎爾壯士心  
人事何勞問古今張蒼亦能論刑法君平徒然卜六壬  
仲尼治國苦不稱曾參事毋猶難信時勢摧人著處生  
英雄遇抑常遲鈍南山磊磊雲氣橫寒泉湔湔終日鳴  
請君拂袖謝人世與爾常爲谷口耕

寄李宗易

潁西多逸興日日白鷗來種竹忽遮屋看山豈用臺有  
時調舞鶴終夜醉新醅何爲蘇門客招邀不可回

覽鏡

愁裏窺明鏡驚看白髮多行年自驅迫服食謾如何有  
相終巖穴無機任薜蘿平生憂國志何惜酒中過

次張闇夫見過之作

獨好中林隱因家清渭川園開溪盡處山合水西邊曲  
藝明時棄長歌稚子傳已深踈曠志不是欲遊仙

王司馬

名廷相字子衡號浚川儀封人弘嘉間官左都無司馬

別後再贈德涵

浮嵐冒晴巘驚風振華林枉節迴峻坂高輿出遙岑層  
丘旣窈窕鬱木亦蕭森君子薦芳酌晤言開素襟憂時  
富危論探道生遐心悲帝蒼梧遙弔屈湘水深嗟余秉  
幽尚及茲成滯淫徒擬孫公嘯猶帶鍾生音事變靡常  
塗達機古所欽陶令耻折腰三嘆歸來吟栖栖茲倦遊  
邈矣行抽簪

燕中懷古

日出北平甸隱隱川塗分南臨古帝臺悵望遙天雲不

見廣成子空懷赤霞文鼎湖龍化久千秋竟誰聞

右都臺

寄滕子冲洗馬

江離被南浦采之將遺誰故人青雲端聊以慰相思校  
文直廣內侍講入崇闈大雅補袞疏飛龍應宸詞永謝  
濁水塗音徽何離離落木滄洲寒迴鴈關山遲行子悵  
離索慷慨秋風時三嘆白頭吟絃促情無涯

龍谿

龍谿秋漲縮石嶼峭江門天氣十月交岸木落以繁窈  
窕古城曲寒靄錯朝昏遡洄缺舟櫓空憶桃花源官事  
已及暇聊爾得寤言學子寡聞道風氣安足論我遊巴

東西歲月歷涼溫暑雨浩川塗僕僕傷旅魂仲尼歿已  
久環轍日復湮天心協道軌庶以謝崩奔

赤壁亭宴集謝蔣子胡子

適志在丘林所嗟嬰宦籍雖偶登嶽謚終爾煙霞隔日  
來有所期蘭尊荷時哲虛館俯江郊况覽豪賢跡鳴雷  
輕隔浦涼風近將夕遊禽屬啁啾落木方戚戚瑤草未  
堪贈佳人徒良覲遠心入洞庭曠覽狹夢澤事往情彌  
牽年衰感易迫已悲王子車終返原生宅賞心非外慕  
懷賢亦屢積且逐俄頃歡爲君謝行役

汎湖篇

漢江秋瀉天河水滙作平湖二千里郢東之小海上峯  
山人飄飄羨門子我乘素舫一帆懸鵬舉風飛欲上天  
棹歌不盡江南調落日滄流生紫煙

南昌行

豫章妖星蝕太白飛入鈎陳鬪光赤欽天博士不敢奏  
遠臣見之空嘖嘖周公卜鼎八百春漢代規摹遠過秦  
山東諸侯自破滅淮王雞犬安能神白洲老子中臺長  
何用文章諛新莽慶陽鄙夫稱雄特學得兵書翻助賊  
南風不用北人力東門黃犬嗟何及君不見河南許汝  
登皎皎真丈夫口中舌可斷萬歲不肯呼匣裏寶刀光

雷電悔不先發梟賊顛報國心丹不言苦甘死寧能效  
囚虜已拚魂作太湖雲何惜血染洪州土黃霾塞天白  
日昏長風翻江帝心怒鄱陽未接勤王師坐令狂奴氣  
先阻汝登汝登振古豪吞聲苟免蟬蛸曹

夢方思道

中宵星漢朗片月墮西林枕簟露華積軒庭涼意深行  
藏安一壑江海夢同心南國無來使鴻飛倘嗣音

次浦口

渺渺風波裏悠悠今獨行到淮餘幾舍隔浦見新城水  
落蘼葭港秋寒鴈鷺坪迢迢嬰世網休道不緣名

雨

常時憂旱魃今夕詫鳴雷急雨翻空下長雲駕海來龍  
腥觸牖入電火燭林迴明發行南畝三農爾莫哀

望峽

揚舲巴峽外幽絕未能言薄采秋江芷時聞芳樹猿驚  
波白帝險暮雨楚峯昏謝客能來此應憐勝石門

秋夜宿朱山人林亭

木葉已下地凄然秋意深對君明月夜寫我素琴心河  
渚迷歸棹關山起暮砧客愁淹不散枉自宿青林

春草謠

塘上草離離照妾春羅衣待君君不來滿庭螢火飛

皇上平南凱還歌

詔下團營大點兵我

皇親作冠軍行九河壓地樓

船去八月橫天劍戟明

鄭吏部

名善夫字繼之號少谷蒲陽人弘正中官南吏部驗封郎中有鄭詩

今夕

薊門城下月今夕定如何白骨凌沙礫黃塵控駱駝羽  
書疲傳置胡馬失關河天子方宵旰孤臣淚已多

白下尋方山人

山人不是方外客十載江湖桑苧悲豈為饑寒歷辛苦

坐教詞藻歛瑰奇南征却道如司馬老去終傷失惠施

白下風煙得見否憶君長誦考槃詩

猛虎行

玄陰冥冥天欲雨蒼兕嗥風劈林莽磨牙下山天為愁  
白日殺人如捕鼠我忽聞言仗劍出彎弓却射白石入  
吁嗟鳳麟無時來故使此輩為民災不然驅汝渡河去  
河北蒼生非草萊

孤山寄太白山人

為問山人孫太初交情歲晚莫教踈孤山梅萼春相惱  
滿地松苓日自鋤江夏肯容禰處士茂陵初卧馬相如



知君不廢茗溪釣書帛能無寄鯉魚

宿象山西塢

亂木藏幽鳥清商集古城冥煙分野意山鬼習人聲未  
把桐川釣聊爲穎水耕巖棲備寂寞倘得遇初平

上毘盧閣

閣迴臨虛曠秋高入渺茫燕歌動易水駿骨望昭王日  
落城笳起天寒塞草黃揚雄輟扈從空自賦長楊

同晉陵諸子遊水西

共有煙霞想言過西水潯薜蘿迷遠近魚鳥入高深花  
氣含風蒲山堂附部陰宴酣忘主客誰賦越鄉吟

讀孫太初潯陽歌

青春寄我潯陽曲長路思君鸚鵡洲此日江湖須遠志  
浮雲西北有高樓嵇康竟少神仙分尚子仍牽兒女憂  
居洛何曾定蹤跡終南渭水入鄉愁

明妃曲

明妃初出塞宛轉意何窮馬上琵琶曲流悲入漢宮自  
言妾薄命萬里去和戎今日蘼蕪草青青向隴中

湛尚書

名若水字元明號甘泉增城人弘嘉  
間官南京兵部尚書有甘泉先生集

過玉山望懷玉巍峩感興有作

步出草萍關舉首見懷玉超然動遐想中有綵雲屋山

高天宇空安知白日速翩翩青鳥使暮歸玉臺宿

贈人遊南雍

遊子涉江去采采南澗芹采之欲何爲歲暮寄遠人懷  
人自不遠歲暮行當返

秋懷二首

涉園採桃李持以贈所知非貴桃李顏不言自成蹊豈  
無蘭桂好質以香自虧默默牛醫子心期浩無涯  
封書寄燕鴈鴈不過衡陽封書寄江魚魚沈江水長江  
水亦有竭封書永不滅耿耿無由宣心緒自中結

過錢塘江將訪大家宰王先生有懷陽明兄

迢迢涉江去江畔生淒風涉之將奚爲南湖采芙蓉美  
人在遠道我心憂冲冲登山足夔魅蹈海多魚龍俯仰  
天地內去子誰余從

訪陽明洞天

道經蓬萊館溪窮到陽明下看東南峯蒼蒼入青冥不  
詣此真境焉知非虛名蹶蹶步巖石山高豈無靈子喬  
不可見佇立魂屏營草木如有識欣欣向余榮采之欲  
誰寄歲晏難爲情

武溪吟懷俞忠襄

武溪溪水深欲往隔雲潯美人在何許風采空遺音憂

思滿南北託之被絃琴惟有江門石可以寫我心

同潘仲魯黃門諸友遊金華雙龍赤松諸洞

曉出蘭谿門逍遙望名山望之已可愛而况遊其間窈  
窕藏境勝夷曠令心閒白雲晝冥冥溪流日珊珊不見  
牧羊子化石只依然心跡俱寂寞悵望未能還

過波羅三首

片帆出扶胥潮打虎門開正愛遠山青白鳥閒飛來  
舉手望飛雲鳴橈過黃木艤舟江上亭虛空觀日浴  
在山月色好出山月色微山月合多少還載滿船歸

市橋道中

春草氣蒸行李朝花露滴征衣悵望平原雨濕欲尋舊  
路雲迷

答邕州別駕鄧誠之

美人昔別藤江湄藤江山前雲浦溪翳門關外春草萋  
王孫王孫歸不歸

嚴相公 名嵩字維中號介溪分宜人弘嘉間  
官少師華蓋殿大學士有鈴山堂集

山塘

山塘深且廣迤邐抱山麓隔浦見人家依依桑柘綠日  
落煙水寒遶塘飛屬玉

尚書顧公展省還惠山贈別

嚴相公

昔賢居柱下公乃隱金門遇合理非偶承恩謁 至尊  
屢荷 宸劄問親奉綸言温今來沐優寵予假歸舊園  
輝耀着賜衣透遲動行軒重經釣遊處鷗鳥應飛翻千  
里見明月幽期誰與論

夜讌歌

瓊酒清蕙肴盈錦燈瑤席張四楹華歌妙舞百技呈夜  
行遊兮悅明星奉君王觴前致誠上天垂休惠我 明  
黃河之水今再澄天雞鳴海鳥升願君舉觴且畱情

漁父

滄洲漁父人不識日暮移舟煙水寂沙頭野飯暫維梢  
蓬裏天涼自吹笛笛聲嘹亮度江門荻花楓葉滿秋村  
溪邊明月常相待世上功名安足論

仰山置酒

春遊入古寺息駕在山阿不飲杯中物其如山色何泉  
聲間鐘磬草色上煙蘿向夕嵐霏起諸峯猿嘯多

塔山望 玉山縣

初聞流泉響漸入深林間靈峯窺寶塔竹徑款禪關掩  
暖花覆谷空濛雨暎山回看萬壑裏雲霧渺人寰

靈谷寺

蓮宮青嶂合松門石逕通窈然深谷裏疑與秦人逢澗

底藏餘雪窻間列秀峯寂寞支公宅惟聞朝暮鐘

元夕侍宴幽風亭觀燈恭述

壬寅正月

節值燃燈夜金宮賜御筵千年逢此夕萬壽願齊天瑞  
擁堦萸雪芳含苑樹煙無窮太平曆長奉 聖人前

曉入 天壽山馬上作二首

迢遞橋陵路透迤松栢林水流千澗合雲起四山陰享  
殿陪祠入行宮扈蹕臨十年重一到荏苒歲華侵  
黃覆依岡殿青連夾路松憑高一駐馬望氣欲成龍信  
與人境隔惟看雲壑重昨宵雷雨足飛瀑滿千峯

鍾山遊眺

可憐春岸飛鷗鳥又見春山長薜蘿峯勢插江谿路小  
峽門橫石水聲多蘋洲看雨維舟坐松嶠穿雲躡屐過  
見說此谿多釣伴月明來聽扣舷歌

登嶽憩半山亭

孤亭翠嶺上層雲煙靄微茫曙欲分仙家鳥道迴莫到  
石壁猿聲清忽聞幽泉樹杪飛殘滴瑤草巖中吐異芬  
看拂丹青朱鳥近焚香先禮祝融君

虎丘寺侍少傅守谿公遊奉次高韻

潭渚逶迤草樹重上方臺殿隱孤峯清輝夜吐吳城月  
虛籟寒生梵院松窓瞰浦雲空引望石留僧講謗遺蹤

移舟更欲歸城市惆悵青山日暮鐘

山顛有閣名千頃雲寺前千人石生

公說法處

蚤入 承天門見鴉次韻

喧鴉爭入 帝城飛映霧翻林颺曙暉  
宮女乍聞驚夢起省郎紛逐散朝歸  
聲傳萬井含鐘杳影落千門帶月稀  
還向昭陽自來去綠窻凝望重依依

無逸殿直舍和少師夏公韻

燈燭通宵晃禁廬霧窻雲閣近宸居  
瑞煙入座香浮苑寒影窺簾月到除  
綵嶺乍聞丹鳳吹穀城先訪赤松書  
歸來未向人間說 天語親承燕對餘

次襄陽

朔雪荒臺獨鴈飛楚鄉凝眺轉依依  
天連浦溆惟寒水山隱城皋已夕暉  
旅客競尋潼口住釣船閒傍鹿門歸  
龐公舊隱巖扉在悵望無因得息機

元旦詣永明殿上香

複道金扉度幾重漏聲猶在未鳴鐘  
司閤老監迎相待燭影開堂雪滿松

賜太液乘舟

蘭舟演漾水雲空花葉田田島嶼風  
棹入瓊波最深處玉樓金殿影西東

孟大理

名洋字望之初號無涯更有涯  
信陽人弘嘉間官南大理卿

別李獻吉

悠悠歲奄暮去去將何之三年不見面後晤安可期盤  
桓杯酒間勸君飲莫辭強歌暫成懽蟲鳴及秋時嚶嚶  
黃鳥音四顧求所依豈無上林枝余意多乖違幸有同  
明月慰我長相思

顧全州見邀江水漲不能赴

桂林山深晝啼鷓一春三見紅日出鳴雷達曙雨浪浪  
洪潦平堦仍入室江間浪湧蛟螭翻鯉魚安得窺龍門  
渡頭行子立惆悵徒繫扁舟不可上美人只在水一方

百遡千迴道轉長雨中空見枇杷落飛盡楊花更斷腸  
客有爲余道京師故事者感而賦傷歌行

君不見長安富家種花竹綺窓蘭榭如金谷四時留客  
宴常開齊絲燕管日追陪酒酣賓主皆傾倒盡道結交  
苦不蚤醉倚佳人池水邊腥膻厭飲出時鮮促歌索舞  
從君欲風度青林明月懸可憐今夕同歡讌人事明朝  
有更變家破亭臺日漸非園荒桃李花如霰主人辭舍  
燕分飛送葬無人弔者稀諸兒道上有饑色舊客相逢  
不相識莫笑袁綵重博徒人生緩急誰所無叩門不以  
親爲解信是昂藏一丈夫

瀟湘行

歲暮浮瀟湘天空豁心目霽日千林開高雲萬峯簇江  
色巖霏水部隈垂蘿飛幌隱樓臺疎松野寺鐘磬響枯  
葦沙洲鴻鴈哀風煙奕奕紛奇狀海賈湖商日流盪浣  
婦新粧映綠波漁人密罟拋洪浪年年歲歲此江津今  
日人過非昔人曾聞埋沒屈原骨亦復飄零賈誼身楚  
王宮中罷歌舞十二峯頭泣雲雨岸上誰家越女謳珠  
簾羅幕桂堂幽江南本自山川勝日暮其如客子愁當  
昔孫吳濞昭烈衡湘轉戰江流血功臣名將已寂寥石  
碑銅柱俱淪滅秦皇威力震羌胡仍迴車駕偏寰區馳  
道至今瀟水上秋風惟見白雲孤白雲孤以飛湘水自  
南下安得從之亦北旋東園種竹耕西野

煙

湘流落日外沙迴暮生煙杳杳千峯失霏霏萬壑連鵲  
翻知浦樹人語辨江船暗裏猿聲斷愁深攪夜眠

黃刺史同登岳陽樓

此地昔曾過危樓今始攀日銜天際樹雲動水中山津  
驛趨三楚江關控八蠻亂帆何處去風浪未知還

懷張仲脩

時謫判晉州

驄馬風流客懸河意緒賒千人寤稷下一辯屈田巴別



憶燕門柳心傷漢苑花謫官猶內郡不似賈長沙

光州道中卽事

草根霜耀日沙際浪吹雲野色時時見鄉音處處分寒  
鱗深避餌凍羽不成羣無限村居樂樵歌隔水聞

遊張園有懷申臺少卿

地主歸何日吾遊復此亭渠深新更鑿蹊滑舊曾經竹  
墅留卿月花簷帶客星不知門外柳別去幾回青

荅何仲默見寄

人世百年常異處帝鄉爲別動三年頻頻入夢見顏  
色日日祛愁多醉眠脩竹穠花田舍裏亂山流水寺門

前幽居不省何時訪好句虛勞萬里傳

過海印寺

傍湖臺殿何年起遶寺煙波望不窮樹裏逶迤銀漢接  
宮前宛轉玉河通長橋晚落千尋影高閣晴含萬里風  
滄海湯求人世外蓬萊今在帝城中

荅顧全州華玉見貽

隱几高齋冬日深叩門何處素書臨美人近隔清湘水  
使者空傳白雪吟邊嶠梅花愁聽角郡庭榕葉憶鳴琴  
春風好慰同遊興夜月應憐異地心

殷給事

名雲霄字近夫號石川山東壽張人弘正  
間官南京工科給事中有瀛洲芝田二集

再游梵宗寺次前韻

故鄉千里外獨立此峯孤雲起風飄泊鴈來書有無出  
處心多感登臨興每殊江山盡搖落松栢尚支吾

聞太初出游

江風散微雨重峯生遙碧林端淨新青梅逕見殘白地  
僻爭訟簡吏散庭宇寂煙水澹孤城齋閣坐成夕忽念  
同懷人清光隔咫尺溪舟時載酒野步或携策靜躁心  
詎異寤歌聊自釋

行路難

少年白馬珊瑚鞭游冶長安大道邊歸來暫向青樓卧

千金買醉不論錢窮巷老生亦何爲經年讀書只下帷  
漢朝天子方好武頭童齒豁憐者誰  
明眸皓齒誰家女蹇脩幾度不相許一朝誤嫁游俠郎  
經年不歸游何處長安隨處有笙歌不念深閨空綺羅  
覽鏡不堪頻下淚紅顏一去柰吾何

石門洞憶太初

孤舟三伏道亭午氣氤氳小憩石門洞風涼已薦薰波  
喧偏怒石山暗欲生雲漁父濯纓處寒流可共君

晚酌石門懷太初

舍擢緣芳澗披蘿入石門秋風正蕭瑟林木亦飛翻溪

淨千峯倒雲歸衆壑昏佳期曠何許獨酌念彌敦

杜楊劉三君子携酒過官舍次杜韻

縣齋微雨過蒼苔越客芳樽向晚開池畔好風驅暑去  
松間明月逐人來三年戎馬身無定千里鄉書鴈未回  
痛飲狂歌聊復爾不堪愁病兩相催

顧宗伯

名可學字與成號惠巖無錫人弘嘉間  
官官保禮部尚書有覆瓿餘集論對錄

都門別李獻吉徐昌穀

悵悵燕都門星裝戒清曉擁蓋集華簪枉爾臺中妙元  
禮時所望文舉特英少惠我以瑤音臨觴見懷抱東旋  
非不歡睽違眷同好願因雲中翰殷勤勿草草

太白山人寓別墅因贈分韻得興字

結屋向南山日夕有佳興耻爲桃李顏不逐狐兔徑  
坐山雲來行吟山籟應與君忘形骸歲久神亦定

雨晴放舟蓉湖同太白山人用韻

青山入虛舟蓮蓉照湖水東瀛有仙居華景寧似此忘  
機逐鷗羣容與滄洲裏散髮白日長誰識鷗夷子

雨中同鄭繼之顧九和孫太初登泉亭再用前韻

亭上起白雲我心如止水所以煙雨中屣履仍過此爾  
欲泝其源聲在翠微裏達生見化理莊生與惠子

方棠陵見過

使節傳呼至虛齋起白雲病餘仍伏枕歲晏忽逢君曠  
積一以慰忘言乃至文酒深愁遽別把臂重殷勤

夏日與羣從山行

散襟侶羣從紆曲此山過夕照下平野水雲交綠禾靜  
言時共適撫念意常多何似青谿子翛然訪薜蘿

華陽洞

鬱鬱華陽洞仙傳直至今松含千歲色雲卧半山陰玉  
柱玄關闕琅函禹穴深鶴鳴初月上獨立闔風岑

惠山寺與孟無涯話別

携樽同野寺降節憩重陰悵別山雲起遐思江水深名

賢廊廟重病廢歲年侵空谷還來日楚然聽足音

秋初方西樵閣老枉駕園亭偕舍弟作

座對星辰列槎分霄渌迴高陽千里駕河朔故人杯開  
榻迎薰入臨軒遲月來清輝當燕晤涼夕共徘徊

秋夜趨 召清虛殿恭述

召對清虛夜仙臺凌紫煙翠華珠樹擁碧殿絳河縣  
密諭褰幃授 綸音造膝傳佇聽行漏遠罷直下瑤天

元旦 賜召詣 永明殿上香經 南內恭述

翠林瞻曙色珠斗拂銀標翔鳳金鋪迴飛虹玉砌遙  
御爐迎碧靄宸陛接青霄 聖主崇儒典榮叨展令朝

奉命恭詣泰和山祭告

九天絳節拂雲行飛磴千盤逼太清海底日窺初倒景  
山腰雨隔半空晴香臺縹緲朝元境鵠馭扶搖降赤城  
慚愧禮臣封禪草祇祈河嶽萬年靈

西直紀恩七首

西宮入蹕擁飛龍

清問時時下九重一劄兩頭鈴

勅璽御題濕處紫泥封

諭對纔從秘殿來龍函猶帶御香開停燈五夜頻回

奏朱榻宸章手自裁時恩賜進封宸章奉

司文內監晝傳來特遣南郊建禮回會見漢家全盛

日當時封禪復何猜時初遣郊禮

仙壇縹緲絕人寰香霧氤氳白晝閒向夕翠華清

道下月明遙聽珮珊珊時在書局候直

御前絳蠟引回鑾中使擎來諭禮官感激恩私惟俯伏

皇壇馳祝萬年安時奉諭遣高近侍忠引臣躬視皇壇

層閣蕭臺半矗雲金梯綵索兩行分遙攀龍級千盤上

中秘那令下界聞無上閣中祠金銀諸天奉秘處特命臣上香殆殊恩也聖上崇

仙門初日耀曠曠寶殿光搖翡翠紅恭捧香幢當

帝座賜緋雙袖欲乘風時初遣高玄殿上香拜服賜麟

贈陳海樵

我欲入山馴虎豹爾能浮海狎魚龍莫將山海分形迹  
那識漁樵趣本同

顧少叅

名可適字與行號蓉峯無錫人正嘉  
間廣西少叅有蓉峯先生遺稿

閒居

閒居豈違情政以慵且癖卻掃謝送迎投鞅偃驅策有  
耳聵聞囂有目瞽分白病狂不願惺習苦孰知易三徑  
權歸來一枝聊棲息中園薦嘉蔬虛庭蔭脩柏客來酒  
共斟獨坐忻所得素懷本若斯吾願不求溢溟鵬諒爲  
遼藩鷄亦云適雖然與物踈幸免爲形役此外儻有營  
誠恐六合窄

門傍植楮

亦近長安市栖林藉所餘敢妨車馬客直傍里仁居梁  
棟何能用柴桑詎久虛漸看高蔭處棲鵲意何如

輓內姪女二首

爲妻弟王靜山作

孩提曾見髻堆螺又向笄年贊斧柯桃核但傳空室信  
薤晞忽聽振鈴歌燕巢泥濕收功近蠶箔絲寒抱恨多  
爾祖泉臺煩致語搏沙骨肉竟如何

深閨不負少年妝擬采蘋花薦晚香底事芳春竟零落  
却緣生命有存亡池娥弄影空留月簫鳳吞聲合斷腸  
脩短由來皆定數不須哀些起巫陽

贈倪雪軒

袁安門前雪不開五馬從繁奚用來惟宐東部曳破屨  
踐爾東橋蒼冷苔

金臺行送友人

金臺差我起千尺一時賢豪何赫奕駿骨真成千里雄  
長驅百城俱辟易燕齊戰爭兩茫茫嘉圖漢策摠陳跡  
臺上登臨高以軒四方珍獻多璵璠君懷至寶莫濩落  
且學東方金馬門

游仙詞二首

讀龍泉僉憲翁  
月甌諸作因賦

莊生隨蝶化列子乘風遊飄飄九垓外六合爲虛舟海

鷗不可玩浩蕩住滄洲白羽揚皓彩潔身漾清流  
瑤樓十二重銀闕三千尺素娥霓爲裳皎皎如練白玉  
兔藥長年萬斛貯瓊液極睇鬱差我安得凌風翮

題扇贈華西樓

西樓一以睨南部亦嬉遨碧渭滋瓊液丹崑炳鸞毛何  
云識君晚翻令笑我曹不見任公子綸垂掣六鰲

和彭別駕石屋登錫山觀五湖之作

錫縣披前蹟丹丘出上方七盤凌絕磴千仞俯滄浪鳥  
道浮霄朗鯨波遠色蒼玄珠遺罔象白石起羣羊陵谷  
推遷外蓬瀛縹緲鄉雲謠惜荒宴萬里泛瑤觴

壽心竹華君

茂苑迎春色高城歛夕霏笙歌花底按燈火柳邊輝行  
樂真能事長生解息機綵衣娛舞地並奏鶴南飛

廛隱艷翁屈六旬司諫張君靜思索詩壽之

夏日朱明景瑤華席以張薰風動舜樂銀露湛堯觴壁  
潤連城價蘭滋九畹芳時應北窻下爲爾論羲皇

贈洪川

洪川住涇里小隱卽安流海月溶溶上江雲藹藹浮山  
青看去鳥沙白任眠鷗羨爾真懷葛悠悠何所求

和元老方樵翁園亭喜雨之作

小雨霑殘暘輕飈汎蚤涼卽看台極近已動少微光儵  
鯉知遊樂翔禽學舞長赤松千載事此道未應忘

月潭贈夏友人

明月行中天寒潭見虛白寓物偶成形一過本無跡道  
人得禪心卽性定真魄爲魚浴天光湛然隨所適

贈張懷亭歸山東

張伯昭姑之女夫偕自山東來省吾姑因有此贈

春來風日陰復晴懷亭言歸將北征繁梅紛紛笛中落  
弱柳裊裊橋畔縈齊關迢遞三千里胡不少留且緩行  
驪駒歌發太逼仄坐客聞之皆動色知子高堂綵服新  
曠之實難心孔棘子昔產也金華之山鬢鬢而出雲歛



見山上之白石崛起皆年羣韶年隨侍返汝父母國學  
詩學禮其有聞斯文未墜神在天壁中漆經烈焰毋得  
然齊魯專門厥有以伏生年九十而遺編復傳泰山峩  
峩世宗仰睇視危峯拄霄漢不知其幾千萬丈曲道盤  
雲歷天門之層層兮下界凡愚那會上七十二君後有  
繼之者玉符金籙昭百代而晃朗茲來惠山之下飲泉  
水洗兮清瀾曷足多乎亦云美何以貯之雙玉瓶併取  
澗中纍纍之石子懷乎懷乎重我懷行將北遊直上黃  
金臺天邊鴈過南征便好爲書傳一劄來

燕秦太保鳳山公園池分賦得鰲架亭歌一首

鴻荒之世昔尚蒙崇丘下谷氣始通茫茫大地曷爲限  
粵有五山嵒嶸而穹窿誰其置之漭漭灑漾瀟瀟乎大壑  
之東洪流滔滔下安底亦恐歸墟沃釜幾若涇玄宰念  
紘紘八極之表將爾也與闔闢爲始終媧皇煉石莫施  
巧海神驅梁難爲工不有巨靈奮其顛負其孰也而任  
乃躬軋綱坤維一以定屹然峙立乎其中山河南紀奠  
大界百代挺生有我公廟堂棟梁需巨木江河砥礪迴  
奔洑五辰咸若凝庶績三朝弼亮熙百工洞庭鈞天聽  
廣岫石室至道探高嵩成功不居謝寵利世皆仰挹上  
東門外漢傅之高風黃石授書拯時畧赤松從遊蓋世

雄午橋野堂秀鬱鬱九龍峻灘流潑潑巍峯冠若兮衆  
迴列中有亭兮下瞰百尺之平波演瀉乎冲澗東欄晨  
看陽鳥拂桑蓋西闥夕覩玉兔升桂宮絳霞的爍兮丹  
闕銀潢湛澄兮碧空一鑑昭兮晃朗八窗啓兮玲瓏偃  
仰兮輿嶠嬉敖兮佺儂日有餐兮紫芝燁燁將事兮商  
巖之阿四翁

赤鯉行

琴生昔日騎赤龍兀然矯首高出洪濤中既來月餘復  
飛去萬人觀之皆茫然竟不知其向何處爾家楊河澄  
潭百尺深中有神物冥棲而陸沈歛然揮霍澎雲浴霧

白日陰陰若也相逢河上之侶須寫瑤華惠好音

顧兵憲

名可父字與新號洞易無錫人正嘉間官廣東瓊州兵備副使有珠厓讀儂在澗等集

過徐丈山莊

多君冥棲性自勒北山文列嶂開丹壁層軒闕白雲  
颺啼竹裏見虎嘯風中聞坐我石巖下蕭然出世氛

對月有懷

長安城中秋月明鴻鴈噉噉夜南征獨上高樓望鄉邑  
暝煙白露蒼茫橫風塵歲暮若為客疲病途危無那情  
却憶山林養性士吹簫控鶴紫巖行

寓直

顧兵憲

國朝雜錄

警直不能寐嚴更中夜過月臨鳩鵲近星繞建章多獨  
倚思無盡沈吟慙奈何終然污華省有願日蹉跎

清溪莊作

久已誤嬰網今來此息機溪山竊同調魚鳥澹相依真  
性端能得幽情詎有違還將覈玄理常掩白雲扉

三月十日

忽忽青春暮采芳猶自妍林香紛蕙蔭野色澹風煙躡  
屨或尋壑移舟還汎川更懽人世不數歲華殘

溪上浦宮贊王侍御俞少叅諸君枉過作

梁鴻宅邊溪水西誅茆聊結野人棲息陰避熱時移樹

抱甕汲流還灌畦清川疎雨輕帆轉高岸和風好鳥啼  
忽枉高文來問訊呼兒燃竹餽蒸藜

爲陶侍御翁封君醒老題壽圖

聞君獨醒意杳與世相違山間薜荔屋松下芰荷衣紫  
泥不驚寵丹壑自生輝採得長生藥朝朝和露晞

蚤春溪上

蘭舟溪上來春意此中裁水色和煙動山容凍霧開青  
看連野燒白望隔林梅荏苒風花思陶然一舉杯

題月村謳飲圖

皜皜明月麗于林臯驩言孔洽爰命同胞烹葵及菽酌

彼松醪坎坎擊鼓蹲蹲執翽旣色旣笑載奴載號匪無  
友生莫如宗祧永此清夕其樂陶陶

君山江亭與張司成燕集

二月春水生江湖到縣城煙青山岫出沙白柳條明鳥  
向雲中没人從渡裏行坐來情自曠對酒與君傾

臨川同年陳惟濬遠惠嘉橘答謝

多君頌橘意手植臨川湄長友不自己故人還念之馳  
函情眷眷傾篚實離離安得園廬並停雲重我思

丹青行

君不見唐時曹將軍下筆寫真妙入神曾奉開元天子  
詔圖畫凌煙閣上之功臣顏面倏皆動生色心神亦擬  
開風塵今之作者誰復似落落宗工見吳子來遊句吳  
二十年往往好事爭延致大夫退食羔羊皮逸士逍遙  
白接羅路人見之道姓字儕輩驚呼嗟絕奇余也飄蓬  
衰朽質拂綃展絢煩君筆倚席睥睨纔經營酒毫惟肖  
何超忽槁容旣入丹青手我有瘁骨君知否昔在顏行  
上疏辭兩披逆鱗蒙鞭笞痛連五內應傷骨卧踰三月  
始生肌前賢輩曾湜四字余亦至今殘半肢平生苦心  
固如此向來奉職惟自持何如執柄多忤鑿譏言易動  
曾不疑吳君吳君且勿誼聽我更僕竟此言參鑑何由

能照物自是正直無私援君亦取貌有何意一一物色  
分硃璠商王繪夢巖中老求賢曷不由斯道公論從來  
祇慨然愛憎之口徒便便妍媸豈皆識真狀何異仗馬  
鳴則捐志士能不死道邊噫乎此意誰可語展圖高軒  
吾愛汝

擬落葉哀蟬曲

葉何落兮蕭蕭蟬何鳴兮悒悒彼秋風兮動容使我心  
兮增憂悵羅袂兮乖離時之逝兮如斯曲房閒兮壁立  
流蘇冷兮空帷望姍姍兮安從鬱悲思兮何其

寄高傳二生

吾聞閩有魯兩生懷貞養潔俱高名問經不肯學奇字  
遺書詎顧攻聊城凌雲獨對三山氣採藥常多五嶽情  
却愧微纏何自繫解龜欲共赤霄行

深青道中

歷歷過治都村村曠平陸春田屬歲收在野多種陸鄉  
氓聞車音扶老出山谷長跼謁道周驩言被清穆顧茲  
川原靖更以郊鄙樸不知居庭時訟牘何煩促儻有君  
子風會見民同俗秩滿空歲年閭然愧司牧

贈俞汝成會試

憐君干將劍結客少年場秣陵戰一捷英聲馳四方歸

來養精銳灼爍芙蓉光匣中時自動鉅鹿豈能忘

酬麻衣洪汝濟

魯仲欲居東海上子房自愛赤松遊爲報麻衣莫浪語  
吾今已具五湖舟

次方閣老秋日重過家兄園亭之作

公來自殿閣猶帶薰風涼頓覺山林氣還生霄漢光題  
留青竹遍嘯引白雲長遊仙更何許莫令忘 帝鄉

珠崖雜詩

訊此岐黎俗猶存邃古初割帷蔽形體刻箭代文書嬉  
戲羣椎鼓畋遊共搏狙向來漸化熟強半附州閭

秋懷二首

異域滄溟上孤城斥鹵中經過稀漢使托處雜黎戎日  
遠天何際雲荒秋不窮誰能忍羈旅轉泊逐飄蓬

傳道西來詔宮車禮七陵輦塗紫氣藹仙馭白雲樂扈  
蹕千官肅靈光百祿憑周南恨留滯竦踊曷能勝

題王仲山寶界山莊

王子幽棲地真能謝世緣湖藏深壑裏門掩衆山前窈  
窕循花徑崎嶇瞰水田一坐吟亭上都令思入玄

避暑溪上

城市苦煩促言過水墅村遠山當野徑高樹映蓬門終

日坐無聒深林蟬獨喧溪傍有夾澗取意濯清源

送寶林僧歸杭二首

上人安禪寶林裏還持衣鉢玉泉遊夜來刹解曹溪偈  
一日歸來般若舟

江村處處皆此岸彼岸摩訶若箇邊歸從長老菩提說  
恒河故在寶林前

再答華學士

來章有結廬清溪上坐對寒山陰  
卽此是丹窟松期何處尋之句

獨卧清溪上端諧佚老心堦庭蒿苒苒門巷柳陰陰高  
野時言駕平臯或袒襟松期殊可問欲共隱君尋

四月廿五日卽事

倭來馳突疑飛雨遁去須臾若及風鼓譟疾登能奪氣  
弩機連斃已摧鋒燎煙猶是迷郊外屠酪仍多暴野中  
可嘆江南安樂土不堪垂老見兵戎

和迂泉秋日農居之作

愛君解組謝塵事食眠常在谿田居草履牧豨足不機  
葛巾枕籍頭忘梳春風桃柳陰陰徑秋水菰蒲淺淺渠  
對人那作青白眼偃然長歲復何如

唐文襄

名龍字虞佐號漁石蘭溪人弘嘉間官官保  
冢宰贈少保并諡有黔南江右關中諸集

斗湖書屋登山聽風對月講學懷友晏坐二首

日沒綠煙泯林叢起陰肅涼月生海澨亭亭照茅屋清

樽幸相對山中影不獨

清溪映欄庭白雲宿柴關牀頭檢亂書短燭燒將殘燭  
殘不必續明月已在山

長淮行送張員外還金陵

河上相見遲河下別何亟百草牽柔風孤峯駐落日長  
淮接江水千里映空色旌旗耀文隼舟艦飛綵鷁丈夫  
意氣多中流楫長擊

胡不歸

秋氣日以高明月流素輝銀河朗如綃織女弄杼機蟋  
蟀鳴堦除北鴈向南飛睠茲遠游子歲邁胡不歸

伏羌

木脫羌山出雲寒羌水清干戈經百戰燈火聚孤城雪  
岸蒹葭色風營鼓角聲將軍功伐在馬革快平生

龍渠春水次平田韻

白雨千巖落春渠百尺深漲前魚桁直波外酒尊陰荇  
葉藏家鶴楊花逐渚禽扁舟遲未去空抱水雲心

送少華許子督學湖南

昔爲柱下史還讀祕中書夜雨分芸草晴天落蠹魚傳  
經問劉向作賦陋相如光滿湖南地文星照太虛

鎮西樓次遂翁韻



縹緲危樓百尺雄，雕甍丹柱映崆峒。月明青海烽煙息，雲隔天山箭栝通。清夜角聲流遠塞，高秋旗影拂長空。輕裘緩帶時登眺，胡虜長驅一嘯中。

錢臨江

名琦，字公良，號東畚，海鹽人。正德間官臨江知府。

登獻花巖

獻花巖畔路，游子數登臨。花發年年好，岩深處處陰。風前收落果，坐久換鳴禽。世路何多事，看山偶會心。

歌風臺

古墨存苔碣，荒臺矚白波。英雄起亭長，父老說蕭何。廢井寒泉夕，閒庭落木多。登臨懷猛士，撫劍一高歌。

憶三弟病

天涯聞汝病，忽漫兩經春。地僻來書少，情深覺夢頻。未須方外藥，擬養谷中神。許踐看山約，俟舟淮水濱。

哭萱兒

今日我哀爾，他年誰我哀。影孤雙淚墮，身在寸心灰。夕照依依短，晨星故故催。死生無限恨，長札不勝裁。

詠鷹

萬里青冥映碧秋，劔翎鈎爪恣飛游。但令搏擊除兇鷲，何事虞羅效巧謀。霧裂雲披山月白，風迴日陷楚天愁。京師多少材官第，尚父鷹揚近有不。

宮柳

青眼纖腰裊娜粧托根常得近  
君王春遮簾戶晴  
煙遶曉拂旌旗王露灑禁鼓聲中眠漸足乳鶯啼處恨  
偏長東風須著慙懃意時散清陰覆未央

晨星

曉鐘聲裡聽烏鳴正是星辰落落時殘影漸消江上水  
踈光微隱道傍枝征人相戴行偏急宿鳥頻窺意尚疑  
牛女畏看河漢滅宵衣暫爾待朝曦

金陵懷古

落木蕭蕭鴈影稀秋風江上立斜暉三山二水依然是  
萬戶千門盡已非商女有花歌白下謝家無燕認烏衣  
城南城北經行遍獨傍秦淮古月歸

蒙山禱雨

蒙山律光臨城北臨之環聳皆其支崖尖徑曷飛鳥避  
峰危石亂行人悲古來受牧義甘死我今歷險勞奚辭  
稽首靈神應賜雨赤子正在皇皇時

括蒼道中

四顧崦岵山復山只疑蓬島馬蹄間煙霞洞僻無人到  
松竹巖深有鳥還問俗徒憐官稅重分居欲買小溪灣  
野夫荷簣翛然去何地幽棲獨閉關

游開元寺

借得公家一日閒  
却來林下訪名山  
白雲飛盡僧歸院  
忽聽鐘聲杳靄間

西湖草堂

踈林不礙目  
小水自成景  
白馬喙晨曦  
主人夢未醒  
起居謝聲華  
飲食却鐘鼎  
我題草堂詩  
悠然心獨領

